

# Guet mues es syy- Zwanzig Joor lang Liebi Lyt



An dääre Fasnacht, jetzt und doo  
Die liebi Lyt - dien zäme schooth  
Mir fyre dr zwanzigscht Geburtstag hitt  
Loos d Gschicht vo uns jetzt - Stigg fir Stigg

Waisch no am Aafang dä Chaotehuffe  
Waisch no wie mir sinn go umme s.....patziere  
S erscht Moll Fasnacht - glaubsch mer das  
Pfyffe, Drummler - kumm mir gän Gas

Aber sicher isch niemer, d Bai die sin schwär  
Nach em erschte Vårs Arabi  
sinn d Batterie widder läär  
D Rächig isch aifach - lägg du mir  
Viel Baiz, viel Rauch, nit wenig Bier

Nach zwanzig Länze, däm scheene Booge  
Stelle sich doo also wichtigi Frooge  
Was wämmer mache? Wo diemers lo krache?  
Wie sell dä Geburtstag Furore mache?

Denn das Joor im Herbscht bim Gulasch Ässe,  
do simmer alli zämme gsässe  
Hän tausig Vorschleeg, glych wie immer  
Am Schluss wird alles immer schlimmer

Ouh jetzt an Cortège, dänggt der Bri,  
Yschooth hopp, ich bi derbyy  
Und so duet in deere Rundi jede,  
mänggmoll bitzli iiberleege,

s wird glacht und gjoohlt, s goot hi und här,  
Der Buuch macht iss weh,  
und dr Kopf wird ganz schwär,  
und au die feiny Barbara Suppe,  
kha lang nyt konkrets uss yss uuselocke

Mer sinn uns ainig, mir wän doch kai Fescht,  
und doch wänn mer alli schlicht numme s Beschit,  
e Fanfare, e Torte, oh bitte kai Fiirwärgg,  
Kai roote Teppich bis aane zem Lindebärg

Mir wänn eigentlich nyt, ganz ehrlich gsait nyt,  
du waisches, mir sinn doch die liebe Lyt  
Mer sinn ganz beschaide, beschaide und schyych,  
sich jetzt s zwanzigschte Moll,  
sich Joor fyr Joor s glych

Denn pletzligg d Idee vo dr Sabine,  
Si wirft iire Satz in d Rundi yyne  
Lueg, wies klar wird, was mer mache,  
lueg, wie die miede Auge verwache

Mir dien uns eifach sälber schängge,  
das, wo sich die liebe Lyt ussdängge,  
Mer dien scho au no musiziere,  
E Rieme mache und flaniere,

Aber wenn mer denn die Larve abziehn  
und d Drummler in e Ecke dien,  
denn goots zu Zwait so richtig los,  
die Fasnachtszyt, die wird famos

Mir gniesse in de Clique Pause,  
Ilberraschigsaiier zem gmietlich schmause  
Mir fyre jedes Häppening  
Was liebi Lyt uns bringe dien

Und wenn mer denn so gar nym kenne  
uns noonemoll e Wysswyh genne,  
Denn ab mit Piccolo in die dunkli Nacht  
Denn - wird au no Fasnacht gmacht

S goot witter mit de Liebi Lyt  
Lueg nit in d Zuekunft, lueg nit ganz wyt  
Mir nämme Schritt fyr Schritt fyr Schritt  
Und genau so, und genau so,  
gniessemer jede Augeblig

## Fasnacht 2016

Die Liebe Lyt  
Syt 1996